

Kurze Begrüßung

- ca. 9:20
 - **Hinweis auf Essensmarken für Mitglieder die beim SSV mitgehen**
 - Erste Begrüßung und Aufforderung zur Aufstellung
- ca. 11:30
Kurze Info über weiteres Programm
- ca. 12:30 Begrüßung -
Ehrungen Gründungsmitglieder -> Thomas und ?
Ehrengabe an Vereine -> Thomas

Begrüßung (½ im Maßkrug)

- Ih derf olle **Nöhamer Vereine** begrüßen
- **a herzlichs Grüß Gott an die Stockschützen Dietersburg und den Imkerverein Dietersburg**

Besonderes Grüß Gott geht an

- VereinsGründer **Franz Matzeder mit Frau Rosa**
- an de **13 Gründungsmitglieder** die no leben! und KOMPLETT erschienen san
- **Grüß Gott an die ehemaligen** Vorstandsmitglieder
- **an alle aktuellen** Vorstandsmitglieder
- alle **anwesenden** Mitglieder des SSV Nöham derf ih begrüßen
Schee dass so vui kemma san!
- Ein Grüß Gott ah an den Vertreter vom Kreis 204, **Ernst Hecht**
- Die Gemeinde Dietersburg derf ih befrüßen.
vertreten durch:2. Bürgermeister **Gerhard Herde**, Gemeinderäte: Regina Zauner, Patrick Lachauer, Feicht Karle
- **Pfarrer Souri mit Ministranten und Mesnerin**
- **Kirchenchor**
- **Graber Franz** als Presse
- **Kahler Gabi** als Fotografin

Gedenken an Verstorbene

Denkt man 45 Jahr zruck , foin oam natürlich vui Leid wieder ei, die maßgeblich am Aufbau und Erhalt unseres Vereins beteiligt warn und mittlerweile nimma unter uns weilen!

Ih kann iatz ned olle nenna, oba ih derf stellvertretend vier Leid nenna, de unserm Verein ganz eng verbunden waren und die uns im letzten halben Jahr verlassen ham:

Ich bitte um ein kurzes Andenken an:

Hiebl Siegfried - Stahlhofer Rudi - Schmidhuber Eduard - Waschlinger Franz

Danksagungen

**Kemma zum für mi scheensten Teil am heidigen Dog,
zum Dankscheensogn!!!**

**Dabei ghört ganz zu Beginn da GRÖSSTE DANK den
Nöhamer Vereinen!!**

Ohne Eich hättts koa Fest ned gem!

**Egal obs beim Aufbau war und hoffentlich ah beim Obbau namoi is,
mia san unwahrscheinlich von Eich unterstützt wordn!**

Ih bin RICHTIG STOIZ auf Eich!

Applaus!!!

Im Einzelnen möcht ih mi no bedanken bei:

- **Frauenbund** die Kuchen nicht nur machen sondern auch gleich verkaufen
- **Sternschützen** fürs überlassen der Bühne, sowie Auf-Abbau
- **Gartenbauverein** fürs Schmücken der Halle!

Sie ham sich allergrößte Mühe gegeben. Dabei is eana der eine oder andere BleameSchmuckPlan zunichte gmocht wordn! Ned durch Blitz und Donner, sondern durch die grouße Hitz! Der geplante Blumenschmuck is praktisch auf den Feldern verdorrt!

Trotz alledem hod unser Halle an wunderbaren Schmuck erfahren!

Herzlichen Dank dafür!

- da **Feuerwehr** gilt unsa Dank für'n Ausschank und fürs Absperren
 - A Dankschee an die Landjugend für Weißwurstverkauf
 - an die Sternschützen an Schnupferclub - an Stopsler fürs Essenaustragen
- a groußer Dank a an:

die Bedienungen um Daniel Hoheneder

ans WeißwurstErwärmungsTeam Schuster Luggi und Feckl Florian

WeißwurstTellerSpülerinnen Lisa und Anna

Schnapsverkäuferinnen Sandra und Katrin

Herrn Pfarrer samt Team mecht ma danga

dem Nöhamer Kirchenchor

Graber Franz für Pressearbeit

Kahler Gabi für Fotos

UND

unsern Taferlbuam Simon Gamsreiter

Unser Verein wird sich in naher Zukunft noch in Form von am Helferfest bei Eich bedanken!

warum 45 Jahrfeier

40 war Corona

Bei 50 ham mia Angst ghobt, do lebt kaona mehr :-))

De wo regelmäßig zu unsam Freidastammtisch kemman, kinnand unschwar erkenna: Da Diesch von de Oidn is scho ganz schee ausdünn!

„Boid werds ES do herom sitzn!“ hoßts dann oiwei in Richtung uns „Junga!“

A so is s'Lem, oba mia hoffma, dass no a zeidl a so bleibt wias iatz is!

In Erinnerung an unsere Gründerzeiten vor über 40 Jahr derf ih no an Groußn Dank an die Gemeinde Dietersburg übermittln!

Ohne die großzügige finanzielle Unterstützung in den 1980igern daad des olles do ned so dosteh! Des waar heid unmöglich!

Zum Schluss gratulier ih no unserm **Gründungsmitglied Mayer Burle, der heid den 61. Geburtstag hod.**

Iatz kimt mei Bericht

und dazua erzöi ih eich a kloane Gschicht

im Winter 80ge 81ge wars - beim Geiern drin
man hod aufm Weiher gschossn - is ja nix anders übrig blim,
do ham a boa findige Mana a Idee ghobt und zwar koa faade
wia waars wenn mia an Stockverein gründen daadn?
dann kannt ma mia a im Summa schiaßn - ganz gwieß
und miassadn ned oiwei wartn bis sEis trogat is.

Gesagt getan, aus Wimm da Wimmer Franze
und ois Kompanion aus Öling da Ölinger Hanse,
ham si zamm do und lang überlegt
wia des ausschau kannt - des ganze Gfrett.

Im April 81ge wars dann soweit
sie ham zum Schuastreder eigladn de Nehamer Manaleid.
36ge san kemma und ham diskutiert hin und her.
soins 2 Bahnen wern oder gor mehr,
soin mia de vorn Schustereder hi - midn ins Dorf eine macha,
do wern de Nochban dann ganz gwieß ned lacha,
oda is außerhoib am Dorf a bessara Bloz,
weil mim Lärmschutz do hods äh glei oiwei wos.
Ah ums Göid is's ganga,
und so Manchem war Angst und banga,
daaß er mid 1000 Mark hänga bleim werd
wenn de Gschicht an Grom einfährt!

Am Schluss oba warn 30ge dafür
und da Wimmer städ an da Strinseitn glei bei da Tür
und verkünt' ganz Stoiz; "oiso dann, ih daad song,
mia gründma an Verein und mia is gor ned bang!"

Erstn Vorstand hod er dann glei söiba gmocht,
ois Zwoatn hod er si an Ölinga Hans oglocht.

A Vorstandschaft braucht oba mehra Leid - Fünfe soitns sei
do lon sa se ah glei no an Hutterer Dane dazua ei.
Ah wenn der mim Eisstoog und mid da Schaufe nix duad,
Mid de Vorschriftn umgeh - DES ka da Dane guad.

An Kassier brauchts - am Anfang da wichtigstse Mo.
oana der mim Göid des ned do is guad umgeh ka.
aufn Würzinger Jakob foid eana Wahl,
er verwaltet ah glei dazua de steigende Mitgliederzahl.

Ois letzts macht des Quintett ,
da Hermann mid seim Bagger no komplett.

A Wies newan Trafoheisl ham sa se oglocht
und mid da Gemeinde a glei no an Pachtvertrog gmocht.

Am Anfang - des kann si ja a Jäda dena,
is des Stockschiaßn freili no a zeidlang des Wenga!
Schaufen wern iatz braucht und Bulldog mid Henga dazua
weil Oawat, ja Oawat de gibts iatz erstamoi grod gnua!

Dann is's a scho los ganga - de Bauerei.
Bulldog han gstandn in oana Reih
und da Hermann mid seim Bagger haut Schaufe um Schaufe
Koud auf de zahlreichn Anhänger aufe!

A Jahr späda warns fertig - de erstn zwoa Bahnen.
und man kann seim Hobby nochgeh, ihr werdses erahnen.

As erste Turnier wird gmocht,
do hod de Sunn ziemlich stoag glocht.
Und man hod erkannt, daass man stod unterm Sonnenschirm,
liaba sitzn daad in am Heisl drin.

Gesagt getan - as Oawettn is ma äh no gweht,
kurzerhand a kloans Vereinsheim entsteht.
As Wossa hod do da Binder Sepp mid de Millkandln brocht
und für des wos außelauf't hams a kloane Versitzgruam gmocht.

Da Matthe hod a Klo eigricht - mid ana echt'n Soachrinna drin,
de hod da Wonga Rudi glei test mid seim ganz'n Hirn.
wia er bei da Tür eigstoipert is
und eam a Binkl auffohd grouß wira Ousteroa ganz gwieß.

Wia eana des WossaKandlschlepp'n dann z'müsam war,
bauns kurzerhand a Wossaleitung her.

Zwoa Bahnen san scho ebbs - oba eigentlich ah nix
und so bauns no a Dritte dazua ganz fix.

Iatz san drei Bahnen do - im Nehamer Rund
"do brauchts no a Halle drüber" - duad da Wimmer bei da Versammlung kund.

Wochalang hams dann Hoiz gsammet in da ganz Gmoa umanand,
de Bulldog samt Hänga san glaufa - außer Rand und Band
Insgesamt wern über 120 Festmeter verbaut
und alloa in de Noglbinder an oam Dog mehr ois 40000 Negl eineghaut!

Am Hutterer Dane sei rechter Dam hod do gor nimma glocht,
weil den hams anschließend mid na rieseigen Blodan zum Dokta eine brocht.

Iatz warns glückseelig de Stockschützn, 3 Bahnen zum schiassn und as Weda
is wurscht
und im neia Vereinsheim kama sche sitzn und löschn sein Durscht.

Da Vorstand Wimmer oba, der gibt no koa Ruah
"De Halle", moand er, "de muaß ma nutz'n - do ghört no a Festl dazua"

Er hoid olle Nehamer Vereine zamm und erklärt eana de Lage.
"Leid mia miassma mid unsern Sach no wos Guads doa - koa Frage"
A Fest soiads wern zu Gunsten von behinderte Leid,
Do mochma Dene und uns ah bestimmt a grouße Freid.

De Nehamer lossn se ned lang bädln und dean liaba handln,
a so is des Nehamer Kind in Not Fest entstand.
92ge war des und es hod olle so guad gfoin,
dass sie des Fest ab do olle 5 Jahr wiederhoin.

Insgesamt 6 moi wird gsammet, glocht, gessn und drunga,
und am Ende ham über 100.000 Euro in da Kasse drin gwunga!
Des - glaub ih und do lieg ih quies ned verkehrt,
is amoi an groußn ZwischenApplaus wert!

Vorstandsmitglieder san kemma und ganga - blos Oana is blim
da Gründer des Vereins - Franz Matzeder aus Wimm.
sage und schreibe 26 Jahr lang is er Vorstand blim.
da Matzeder Franz - eben aus besagtem Wimm,
dann gäd er in sein verdienten Ruhestand
und beobacht, wos sei Nachfolger ois kann.

zur gleichn Zeit is da Hofna Edi kemma - der guade Mo
und schaut se de Sach bei de Nehamer Stockschützn oh
Da Edi is da Beginn unserer erfolgreichen Jugendzeit
dene Buam zum zuaschau - des is bis heid no ah grouße Freid.

Scho beim ersten Turnier von unsere Könner
dern Viere von Eana an Bezirkspokal gwinna.
Weida gäds mid Deutsche Titeln - des duad uns guad gfoin
und sogar a Europameisterschaft duad Oana vo Eana hoin.

Natürlich derfan mia über de Zeit des sportliche ned vergessn,
zu Beginn is ma in da Hameklass festgessn.
Dann hod ma Dieselbige hinter sich lossn
und fortan in da B-Klass drin geschossn.

De Leistungen wern stetig bessa und de Aufstiege kemman
Bezirks- und, Oberliga san ois koane Themen
grod de Bayernliga de dagrein ma einfach ned,
Johr für Johr wirds probiert oba es bleibt a grouß's Gfrett

Bis eine in de jüngere Vergangenheit
do ham dann - unsane inzwischen gstandner Manaleid,
sehr zur Freude der gesamten Mitgliederschaft
Endlich an Aufstieg in de höheren Ligen geschafft.
Und so manchem Verein wird iatz bang - des is ned oiwei so gwesn
duad er den Nam SSV Neham auf da Startlistn lesen.

So - des war da Rückblick auf 45 Jahr - liabe Leid
ih hoff es war ned langweilig und hod eich a weng gfreid.
ioatz feiern mia no midanand und dMusi spuid uns auf
und hoamgeh deama mia nur mid am drum Rausch.

PROST
